

助贝勒。访夔臣。绍彭来夜谈。

初四日子正一刻十分，测彗星距北极十度二十七分三十八秒，距大理八度五十六分，近因彗星距北极日远一日，故昨夜以远镜窥，其光尾甚为暗淡，其长约二度有奇，又测得现在彗星距地一万三千二百万里，距日二万二千二百万里，距日愈远则光尾愈暗，故后二三日彗星当不见也。



近日有言启明星光芒太甚，恐有变常之处，及星旁有异样之星，其言皆非也。木星现距日九十度，与太阳相交为正角，正以日光正射，故见其光芒太甚也，星旁并无异样之星。最近木星者为火星，其色深红，相距约三度四十三分，木星之西南角亦有一明星为土星，相距十一度有奇，木星在东北，土星指西南，火星居土木之间。

初七日(8月1日) 晴热，薄暮殷雷微雨，晚霞满天，大风。是日二起，道府，无军机起。来时早，读甚倦，已正余先退。驰回横街，恭奉先祠神轴入城，令人戴神龕于首，请至城宅，犹未安奉也。小山行色匆匆矣，不胜感触。归家动闲气，盖肝疾，非由他人也。夜访睦菴，商派差使。陕西门人张承熊来，未见。萧山和尚淡如来请藏经，持伯述函至，未见。

初八日(8月2日) (放风。)晴热。读好，一切照常，午初二退。到庙，晚祭惇邸、助贝勒、恩露圃同上。以张天瓶书《心经》寄鹿卿。闻奉移择吉约在重阳后二三日。彗星隐，未确，人云仍有。

初九日(8月3日) (压布灰。)晴，奇热。早晨晤伯寅，谈及假印事，伯寅有仁言。来尚早，读又倦，已正先退，到署略有人。出城，回横街，骊驹黯然，坐卧皆不适。晚访兰孙长谈，归犹写扇对，又写唁李沧桥、徐雨之函，噫，劳矣。